
William Marrion Branham

Moromuoa

Empa mehleng ea lentsoe la lengeloi la bosupa...

Tšen 10:7

TSE KAHARE

1

MOPOROFETA Na?

5

TŠEPISO Ea MOPOROFETA
MATSATSING A QETELO

9

TŠIMOLOHO

12

LILEMO TSA BOCHA

22

TOPALLO Ea MOLLO

28

LIPHIRI Li SENOTSOE

32

LIQOTSO

Voice Of God Recordings, Inc. ke tšebetso ea lentsoe e sa kheseng phutheho empa e ineetse ntšetsopeleng ea Evangeli ea Morena Jesu Kreste. Thapelo ea rōna ke hore u hlohonolofatsoe ke bukana ena ho chabisetsoa kutloisiso e fetang mabapi le hora e morao eo re phelang ho eona.

MOPOROFETA NA?

Kahara Bibele, esale Molimo o tlisetsa batho ba lefatše Molaetsa oa Oona ka moporofeta oa mongoaha. O buile le Moshe ka sehlahla se tukang oa mo roma ho ntša Baheberu Egepeta. Eaba ho abjoa Topallo ea Mollo e totobetseng le lipontšo tse ling ho nepahatsa tšebetso ea hae. Johanne Mokolobetsi o tlisitse Molaetsa a hlophisetsa lefatše ho fihla ha Messia. Mohla a ne a kolobetsa Morena Jesu Nokeng ea Jordane, thomo ea Johanne e lelekelang Konyana ea Molimo e kile ea thasisetsoa ke Puo e tsoang Leholidōng, “Enoa ke Mora oa ka ea ratoang, eo Ke khahlisoang ke ho lula ho eena.” Lilemo hamorao, Puo ea Morena e boetse ea utluoa e bua le moporofeta mohla A buang le Pauluse ka Leseli le fahlang, hamorao a rongoa ho hlophisa likereke. Ho haola le Litestamente e Ncha le ea Khale, Molimo ha o eso bue le batho ba Hae ka tsamaiso ea bolumeli kapa ka mokhatlo o hlophisitsoeng oa borapeli. Kamehla O buile le batho ka monna a le mong: moporofeta oa Hae. ’Me baporofeta bana O ba netefalitse ka lipontšo tse mohlolo.

Empa kajeno ho ka thoeng? Na ebe Molimo o sa senolela baporofeta ba Hae Lentsoe? Na lipontšo tse mohlolo li sa le teng? Na ebe Molimo o sa tla romela moporofeta oa letsatsi la joale lefatšeng? Karabo e tiileng ke,

“E!”

Empa re tla tseba joang ha moporofeta a hlaha? Ebe tšobotsi ea hae e tla ba joang? Ebe o tla itšoara joang? Ebe o tla re hlahisetsa pontšo ea mofuta mong? Ebe o tla phethisa Mangolo afe?

Baporofeta ba khale e ne e le banna ba Molimo ba linatla, ba sa tšabe ho khahlana le mekhatlo ea borapeli. Bonneteng, kamehla ba ne ba roreloa ke tšebeletso ea bolisa. Elia o kile a phepetsa mekhatlo ea borapeli ea letsatsi la hae, a ba botsa hore na ebe Molimo o tla hlompha nyehelo ea bona, kapa ea hae na. Eaba ba hlabaka litlatse. Ba porofetaka. Ba tlolaka ba hloella aletare. Ba itlhabaka ka lithipa. Empa Molimo ha o a ka oa ba utloa. Elia a lelala Lehlomōng a re, “Ho ke ho tsejoe kajeno hobane U Molimo Israeleg, le hobane ’na ke mohlanka oa hao, le hobane tsena tsohle ke li entse ka polelo ea hao.” Eaba o theola mollo Leholumōng ho chesa nyehelo. Moporofeta Mikea o hanetse Morena oa Israele, le moifo ’ohle oa boprista, mohla a na a khalema Moprista e Moholo Tsedekia ka ho porofeta leshano. Moprista e Moholo a mo jabela sefahleho ’me Morena a mo hlahlela ntloanatšoana ka ho bua ’nete. Esita le Morena Jesu o kile a hlouoa ke mekhatlo ea borapeli ea letsatsi la Hae ba ba ba Mo thakhisa mabapa le lisenyi tse soto ka ho fetisia. Efela haeba nalane e tiile, moporofeta o tla be sa le a hlouoe ke tsamaiso ea sejoale ea bolumeli, ’me o tla pharoa a bitsoe mokhelohi, moporofeta oa bohata, kapa hampe le ho feta moo. Empa Molimo o tla ema le mohlanka oa Hae.

Hola moporofeta a ka hlaha letsatsing lena la joale, ebe Kereke ea Katolike e ka mo amohela joang? Kereke ea Baptise eona? Kereke ea Luthere eona? Bolumeli bo bong bona?

Morena Jesu o laetse bohole ba lumelang ho Eena: “Mehlolo e tla tsamaea le ba lumelang ke eona ena; Ka lebitso la ka ba tla leleka batemona; ba tla bua lipuo tse ncha; Ba tla tšoara linoha; ha ba noele ntho e kotsi, ha e ka ke ea ba bolaea; ba tla bea matsoho holima ba kulang, ’me ba tla fola.” (Mareka 16:17-18). Na

ebe Lengolo lena le tiile kajeno? Haeba le sa tiea, ebe Mantsoe a Morena a feletsoe ke matla a 'ona neneng? Ho haola le Bibele, baporofeta ba khonne ho folisa bakuli, ho leleka batemona, le ho etsa mehlolo. Moshe o beile noha ea borase pontšeng ea batho ba Iseraele ho folisa ba lonngoeng ke linoha tse mahloko (Numere 21:9). Naamane, Mosiria ea seriti, o tlie ho Elisha ho folisoa lepera (II Marena 5:9). Mohla mohlankana a ne a oela sefesetereng se kaholimo, moapostola Pauluse o kile a mo hamarela a busetsa bophelo 'meleng o shoeleng (Liketso 20:10). Re fumana rekoto ea lilemo tse $3\frac{1}{2}$ tsa bophelo ba Morena Jesu, empa koana lilengoaneng tse 'maloa tseo, O folisitse bakuli molebe. Lifofu tsa bona. Balepera ba ntlafatsoa. Botsebetutu ba boela ba utloa. Ba shoeleng litho ba tsamaea. Ha folisoa maloetse a mefuta eohle (Mattheu 4:23).

Molimo o bile oa nèpahatsa baporofeta ba Hae ka mekhoa e fapanang le ea lipholiso. Esitile le merero e kubutiloeng ka thata ea pelō e tsebisitsoe banna bana ba Molimo. Morena Nebukanesare o kile a tsietsua ke toro, a mpa a sa hopole likateng tsa eona. Eaba Daniele moporofeta o phethela morena toro le seporofeto se hlahlamang (Dan 2:28). Ha ho letho le kileng la sirela Salomone mohla Mofumahali oa Sheba a fihileng pela hae. A tletse Moea hoo a 'moleletseng lipotso tsa pelō ea hae le *pele* a li botsa (I Marena 10:3). Elisha o boleletse Morena oa Iseraele merero eohle ea Morena oa Siria, ekasita le mantsoe a sebiloeng kamoreng ea hae (II Marena 6:12).

Ka liketso tsa Hae, Morena Jesu o supile Moea ona oa temoho e le Moea oa Kreste. O senotse semelo sa Nathanaele mohla A itseng, "Bonang Moiseraele oa sebele, eo ho seng mano ho eena!" Jesu a tsoelapele a bolella Nathanaele moo a na a le teng mohla Filipi a

'molellang ka Messia (Johanne 1:48). Hoba Nathanaele a bone Jesu ea tsebang pelō ea hae, a Mo elleloa ka potlako hoba ke Kreste. Khetlo la pele ha Jesu a bona Petrose, O 'moleletse lebitso la ntatae, Jona (Johanne 1:42). Eaba Petrose o tèla tsohle a latèla Jesu bophelo ba hae bohle. Jesu o kopane le mosali oa Mosamaria selibeng a mo bolella libe tsa hae tsa maoba. Mantsoe a hae a pele a itse, "Monghali, kea lemoha hobane u moporofeta" (Johanne 4:19). Batho bana boraro ba bona ba tsoile mehlahloeng e fapaneng ea bophelo, empa ba lemohile Jesu mohla A ba hlakisetsang neo ea temoho.

Na ebe neo e nyametse mohla lehlaku la ho qetela la Bibele le neng le ngoloa? Haeba mehlolo ena e ngotsoe e hlakile hakana Bibeleng, e kae kajeno? Ruri moporofeta oa letsatsi la joale o tla netefatsoa ka mehlolo.

Na ebe Molimo o lebetse batho ba Oona? Na ebe O sa khona ho folisa bakuli? Na O sa bua le rōna ka baporofeta ba Oona? Na ba teng baporofeta ba bonetseng letsatsi lee pele?

**Na li sa le teng liporofeto
tse saletseng ho phethisoa?**

TŠEPISO EA MOPOROFETA MATSATSING A QETELO

Mantsoe a ho qetela kahara Testamente ea Khale a tšepisa sena: “**Bonang, Ke le romela moporofeta Elia pele ho letsatsi le leholo le le tšabehang la MORENA: ’Me o tla busetsa pelō ea bontate ho bara ba bona, le pelō ea bara ho bontata bona, hore ke se tšohe ke e tla ka otla lefatše ka ho le timeletsa.**” (Mal 4:5-6)

Letsatsi le leholo le le tšabehang la Morena le a tla, re tlameha ho shebella moporofeta Elia ka botšepehi ke hona. Kahara Bibele, baporofeta ba ne ba sa etele mekhatlo ea borapeli ba sehlooho. Ba tlide ho sehlotšoana se ’maloa. Hola moporofeta oa Malakia 4 a ka fihla, ’me a fosoa teng. Ho ka thoeng haeba a ka tšoana le baporofeta ba khale, lemohuoa ke batho ba ’maloa feela? Hola moporofeta enoa a ka khutla letsatsing la ho qetela, re tla mo lemoja joang? Karabo e hlakile kahara Mangolo. O tla rua semelo sa moporofeta. O tla tseba merero ea pelō. O tla etsa mehlolo. Mekhatlo ea borapeli e tla leka ho mo seholla. Empa o tla lemohuoa e le moromuo oa letsatsi ke bakhethoa ba ’maloa.

Re tla tseba kang mohla Elia a khutlang? O tla bonahatsa litšobotsi life ho re thusa ho mo elelloa?

Elia e ne e le monna oa lehoatata. Lipontšo tse khōlō le meeka li latetse tšebetso ea hae. O rerile khahlano le limpe tsa letsatsi la hae. Haholo o rerile khahlano le boitšoaro bo hlephileng ba Mofumahali Jesebele. Mohla Elia a nkeloang Leholimōng ka koloi ea mollo, moea oa hae o theohetse holima Elisha. Tšebetso ea Elisha

ea ntano ateloa ke lipontšo tse khōlō le meeka, o bile a rera khahlano le libe tsa lefatše. Baporofeta ba babeli bao keha ba eme khahlano le mekhatlo ea borapeli ba letsatsi leo. Makholo a lilemo hamorao, moea oo oa khutlela lefatšeng ka hara Johanne Mokolobetsi. Moporofeta Malakia o bonetse pele ho khutla ha Elia ea tla tsebisa Morena: “*Bonang, Ke roma lengosa la ka, le tla hleka tsela pela ka...*” (Malakia 3:1). Johanne Mokolobetsi o ne a futsitse kaha a memetse pako ea bana ba Molimo. Joaloka Elia, o rerile khahlano le morena le mekhatlo ea borapeli ba sejoale. Morena Jesu o omètse Johanne Mokolobetsi e le moporofeta oa Malakia 3 ka hara Buka ea Mattheu (11:10): “*Hoba ke eena, ea boletsoeng Bonang, Ke roma lengosa la ka pela sefahleho sa hao, le tla hleka tsela pela hao.*” Luka 1:17 e re moea oa Elia (Eliase) o ne o tla aha ka ho Johanne Mokolobetsi, “*Me o tla mo etlella pele ka moea le matla a Eliase, ho busetsa lipelō tsa bontate ho bana ba bona.*” Empa le lemohe hoba karolo ea bobeli ea Malakia 4 ke hona e tla tlatsoa: “*...le lipelō tsa bana ho bontate ba bona, hore ke se tšohe ke tla ka otla lefatše ka ho le timeletsa.*” Karolo ea Lengolo leo e tla phethisoa pele Kreste a Khutla Labobel.

Lilemo tse likete tse peli ka mora Johanne Mokolobetsi, ho fihlile nako ea ho khutlela ha moea oa Elia lefatšeng.

Letsatsi leo le fihlile! Mongoaheng ona, re bone ho khutla ha moea oa Elia. O hanetse tsamaiso ea bolumeli ba sejoale. O hanetse libe tsa lefatše. O bontšitse mehlolo le meeka e sa baloeng. O rerile Bibele lentsoe-ka-lentsoe ho qala ho Genese ho fihlisa Tšenolo. Moporofeta oa Malakia 4 o tlie ho latela tšepiso, o tlisitse Molaetsa o tsoang Teroneng ea Molimo o Matlaohle. Lebitso la moporofeta eo ke **William Marrion Branham**. Re ’mitsa “Moena Branham.”

“Ke William Branham, eo ke mo ratileng ka mo lumela e le moporofeta oa Molimo.” Oral Roberts, ’moleli ea tsejoang lefatšeng le mothei oa Oral Roberts University.

“William Branham o tlie ho rōna joaleka moporofeta oa Molimo a re bontša palokholong ena ea mashome a mabeli tsona lintho tse supiloeng Lievangeling... Molimo o etese batho ba Oona, hobane moporofeta e moholo o hlahile hara rona.” Dr. T.L. Osborn, ’moleli oa Pentekosta le mongoli oa bokhoni.

“Pele ho rapelloa motho, o ne a hlalosa a qapolisa lipabo tsa motho ka nèpahalo, a be a qapolise likateng tsa maphelo a bona - metse ea habo bona, liketso tsa teng, lietsahala - esita le morao koana bongoaneng ba bona. Branham ha a eso tlalile le hang ka lentsoe la tsebo lilemong tsohle tseo ke li qetileng le eena. Hoo ho kenyelletsa, lebakeng la ka, liketsahalo tse likete.” Ern Baxter, ’moleli, manejara oa Matšolo a Branham ka lilemo tse supileng, eena ke e mong oa bathei ba sethatong ba British New Church Movement.

Ha ho monna ea kileng a susumetsa lefatše ka sefutho hakana ho tloha mohla Morena Jesu Kreste a ne a tsamaea holima lefatše. Ho tloha qalong e ithobileng ea motlotloana oa phaposi e le ’ngoe maralleng a Kentucky, ho fihla Amarillo, Texas, moo Morena a mo isitseng Hae, esale bophelo ba hae bo teetsoe hare ke liketsahalo tse hlolang tlhaho. Ka tataiso ea Lengeloi la Morena ka 1946, tšebetso ea Moena Branham e tloebile hlase e hotelitseng lekhathela litsoseletso tsa litonana tsa pholiso tse haotseng le Amerika le lefatše ho pota. Ho fihlela letsatsi lena, o lemohuoa ke boranalana ba Bokreste e le “ntate” le “morala-sekhahla” oa tsoseletso ea pholiso ea bo 1950 e leng eona e fetotseng Kereke ea Pentekosta ’me qetellong ea hlahisa motsamao o mahlahahlaha oa Charismatic, oo kajeno o batlang o tšoaetsa bolumeli ka bong ba Protestanta. Leha ho le joalo, lefutso le ba alamile, haele moo malumeli a hobosa lithuto tsa hae a bile a latola thomo ea hae.

Hohle moo a ileng teng, Molimo o pakile Moena Branham e le moporofeta oa moloko ona. Joaloka Jobo, Morena o buile le eena ka setsokotsane. Joaleka Moshe, Topallo ea Mollo e mo eteletse pele. Joaleka Mikea, a tujoa ke tšebeletso ea bolisa. Joaleka Elia, e le monna oa nahathote. Joaleka Jeremia, o ronngoe ke Lengeloi. Joaleka Daniele, o bone lipono tsa kamoso. Joaleka Morena Jesu, o tsebile merero ea pelō. 'Me joaleka Pauluse, o folisitse bakuli.

Morena o boetse o etetse batho ba Oona ka moporofeta. Horeng e lefifi-fifi ea nalana, mohla boitšoaro bo hlephileng 'me bo hohlometse matebong a eso bonoe pele 'me le libetsa tse falatsang li likalika holima molapono, monna ea ikokobelitseng o romiloe a e tsoa ka pela sefahleho sa Molimo ho memela morabe o shoang pako.

Morutuoa ea ratoang Johanne o ngotse tjena ka Morena Jesu:

Taba tse ling li sa teng tse ngata tseo Jesu a li entseng, hojane, li ka ngoloa ka bonngoe, ke lekanya hore le lona lefatše le be le ke ke la lekana libuka tse ka ngoloang. Amen. (Johanne 21:25)

Ho ka thualo ka bophelo ba Moena Branham. Ho fumanoa mabanta a 1,200 a lithero tse hatisitsoeng tse phetang lipale tse likete tsa bophelo ba monna enoa oa mohlabani. Koana khafetsa re utloa mapaki a macha a tšusumetso ea hae holima maphelo a limilione tsa batho. Bukana ena e ke ke ea ngoapa le bokaholimo boo khahlamelo ea monna enoa oa Molimo e e finyeletseng lefatšeng.

TŠIMOLOHO

“Mohla ke ne ke tsoalloa Kentucky kahara motlotloana holimo mono, Lengeloi la Morena le kene ka fesetere la ema mono. Keha Topallo ea Mollo e eme mono.”

Mafube a ne a phunyeletsa a khaola lefifi la sepakapaka se pholileng sa ’Mesa. Fesetere e le ’ngoe, ea patsi keha e butsoe ho lumella leseli la hoseng ho chabela motlotloana oa phaposi e le ’ngoe. Hoseng hona keha maborokoane a luluetsa a tsorame mabapa le fesetere a bina ka bokhoni bohole ba matšoaf a hae. Ka hara motlotloana, Charles Branham e mocha a kenya matsoho a hae kahara para ea hae e ncha ea liofarolo a sheba mohatsae ea lilemo li 15. “Re tla mo rea William,” ntate a rialo.

Eaba sefesetereng ho kena Leseli le kaholima tlholeho. Leseli la parola phaposi la oka-oka holima moalo oo lesea le sa tsoa tsoalloa holima ’ona. E ne e le lona Leseli le ntšitseng bana ba Baheberu Egepeta. E ne e le lona Leseli le kopaneng le Pauluse tseleng ea hae e eang Damaseka. ’Me Le ne le tla tsoelapele ho etella lesea lena pele ho bitsa Monyaluoa oa Kreste lefatšeng. Leseli leo e ne e le Lengeloi la Morena, Topallo ea Mollo; ’me Le ne le boetse le itlhahisitse ho monna.

’Me ka mono, ka hara motlotloana ona oa lithupa, hoseng hoo ha ’Mesa oa la 6, ’melehis i a bula fesetere ho chabis a leseli hore Mama le Papa ba bone tšobotsi ea ka. Eaba Leseli le lekanang le mosamo le höba le kena fesetereng. La likoloha moo ke neng ke le teng, la ntoo theohela liphateng. Batho ba ’maloa ba lithaba keha ba eme mono. Ba ntse ba lla.

Lehae le ithobileng le tholoa maralleng a Kentucky e ka boroa, pela motsana oa Burkesville. Mohla la ’Mesa 6, 1909. Lesea e ne e le letsibolo la bana ba leshome ba tsoalloang Charles le Ella Branham.



William Branham o hlahetse mona, Burkesville, KY.

Haisa-isa eaba Lengeloi la Morena le boela le etela William Branham e mocha.

Bongoaneng ba hae, mohla Lengeloi le buang le eena la ho qala, le itse o tla phela bophelo ba hae pela motse o bitsoang New Albany. A kena ka tlung ho bolella 'mè oa hae se tsoa etsahala. Joaloka 'mè ofe le ofe, a se ke a natsa pale eo hakalo a mpa a mo robatsa liphateng ho thoba matsoalo a hae a ngoana. Lilemo tse peli hamorao, lelapa labo la fallela Jeffersonville, Indiana, limaele tse 'maloa ho tloha motseng o ka boroa oa Indiana oa New Albany.

Lengeloi la boela la bua le moporofeta e mocha lilemo tse 'maloa hamorao. Mohlang oo keha e le Loetse e khutsitseng 'me letsatsi le futhumetseng le chabile hara mahlaku a mebalabala a hoetla. Thaka lena keha le qhiletsa le jere linkho tse peli tsa metsi le theoha ka tselana. Seqo sa poone se ne se bofiloe tlasa monoana oa hae ho thibela lerole. A lula fatše ho phomola meriting oa sefate sa papoliri e telele. Likeleli li tšoloha mahlong a hae a itelela bomalimabe ba hae: Metsoalle ea hae keha e ithabisa khatamping e tšoasang lihlapi, athe eena a tlameha ho thotela ntatae metsi. Hang, moea oa qala oa

fuluha o tsokotsa sefate kaholima hae. Eba o tlhlakola mahlo o ema ka maoto a hae. A utloa molumo oa mahlaku a tsokotsoang ke moea...empa moea o le sieo. A sheba holimo, 'me holimo ho ella nqa bohare ba sefate sa papoliri, keha ntho e tsokotsa e fehla mahlaku a omileng.

Eaba hang Lentsoe le a bua, "U se ke ua noa kapa ho tsuba kapa ho silafatsa 'mele oa hao, u emetsoe ke mosebetsi mohla u holang." Moshanyana ea harohileng letsoalo oa lilemo tse supileng a lahla linkho tsa hae a mathela ho 'mè oa hae.

Joaleka moporofeta Samuele, Molimo o no o boetse o buile le ngoana.

Liveke tse 'maloa hamorao, ke mohla a ntseng a bapala limabole le moena'e. Eaba o arubetsoa ke maikutlo a makatsang. A sheba holima Noka ea Ohio 'me a bona borogo bo botle. Banna ba leshome le metso e tšeleta ba oela nakong eo borogo bo parolang noka. Moporofeta e mocha o ne a bone pono ea hae ea pele. A bolella 'mè oa hae, eena a ngola pale ea hae. Lilemo hamorao, banna ba 16 ba oela ba eshoa ho ntse ho hahuoa borogo ba Seterata sa Bobeli mane Louisville, Kentucky bo parola Noka ea Ohio.

Morena o ne a mo bontša lipono tse tlang ho tla. 'Me joaloka baporofeta ba mo etileng pele, lipono halieso hbolehe le ka mohla.

LILEMO TSA BOCHA

Bophelong bohole ba hae, esale Moena Branham a labalabetse ho fihla lehoatateng. Lilemong tse 18, a tloha Indiana a ea lithabeng tse khohlahetseng tsa bophirima. Eaba o lula-lula nakoana Arizona 'me a tlameha ho khutla.

Tsatsi le leng ka qeta ka hore ke sibolotse leqheka la ho tima pitso eo. Ka fallela bophirima ho sebetsa polasing. Motsoalle, boholo ba Molimo kantle mono bo lekana le boholo ba Hae tulong efe feela. Ke u kopa ho ahisoa ke boiphihlelo ba ka. Ha A u bitsa, Mo arabe.

Hoseng ho hong ha Loetse selemong sa 1927, ka re ho 'mè ke nka leetong la ho kampa Tunnel Mill, e bohole ba limaele tse ka bang leshome le metso e mene ho tloha Jeffersonville moo re neng re ahile teng mohlang oo. Athé 'na le metsoalle e 'maloa re rerile leeto la Arizona. Mohla 'Mè a utloelang ho tsoa ho 'na, keha ke se Tunnel Mill empa koana Phoenix, Arizona, ke baleha Molimo oa Lerato. Bophelo ba polasi ba 'natefela nakoana, empa ba qala ba tsafala kapele, joaloka monyaka ofe oa lefatše. Empa e re ke bue mona, ho Bokoe Molimo, boiphihlelo le Jesu bo eketsa monate le monate ka linako tsohle 'me le ka mohla ha bo tsafale. Jesu o aba khotso e phetheleng le matšeliso a kamehla.

Ke khafetsa ke utloa moea o pholletsa hara liphaene tse telele. Ea ka ke utloa Puo ea Hae e bitsang hole koana morung, e re, "Adama, u ho kae na?" Linaleli li bonahala li le haufi hoo u ka li kholang ka liatla tsa hao. Molimo o no o bonahala o le haufi haholo.

Ntho e 'ngoe ka naha eo ke litsela tse hara lehoatata. Ha u ka kheloha tsela, u lahleha habonolo. Hangata baeti ba bona lipalesa tse nyenyane tsa lehoatata ebe ba kheloha 'mila ho li kha. Ba lelera lehoatateng 'me ba lahleha 'me ka linako tse ling ba bolaoa ke lenyora. Le tsela ea Mokreste e joalo - Molimo o na le 'mila. O bua ka 'ona ho Esaia, khaolo ea 35. O bitsoa "Mila oa Khalalelo." Hangata menatjana ea lefatše e re ngokela hole

le 'mila. Ebe u lahletsoe ke boiphihlelo ba hao le Molimo. Ha u lahlehile lehoatateng, ka linako tse ling ho hlaha liphalana. Ho batho ba bolaoang ke lenyora, liphalana tsena e tla be e le noka kapa qanthane. Hangata batho ba matha ba li sala morao ba itihele hara tsona ba mpa ba iphihlela ba kulupana hara lehlabathe le chesang. Nako tse ling liabolosi o u bontša seo a se bitsang monyaka. Empa e le liphalana feela, ha se mannete. Ha u mo mamela u tla iphihlela u ikatetse mahlomola hloohong. U se ke ua mo mamela, uena 'mali ea ratehang. Lumela Jesu ea fang ba lapileng le ba nyoriloeng metsi a phelang.

Tsatsi le leng ka fumana lengolo le tsoang lapeng le tlaleha e mong oa baena ba ka a kula haholo. E ne e le Edward, ea ntlhahlamang. Ehlide ka e hopola e se mpe hakaalo, ka lumela a tla itokela. Empa mantsiboea a mang matsatsi a 'maloa hamorao ha ke tsoa motseng ke feta phaposing ea ho jela polasing, ka bona pampiri holima tafole. Ka e thonaka. Ka bala, "Bill, tloo makhulong a leboea. Taba e bohlokoa haholo." Hoba ke bale tsebiso eo 'na le motsoalle ra tsoela makhulong. Motho oa pele eo ke kopaneng le eena e le Lone Star ranger oa khale ea sebetsang mono polasing. Lebitso la hae e le Durfy, re mpa re 'mitsa "Pop." Tšobotsi ea hae e hlokofetse ha a re, "Billy moshaana, ke u tšoaretse litaba tse bohloko." Ka eona nako eo moetapele a hlaha a etla a nyoloha. Ba mphetela ka thelekramo e sa tsoa fihla, e beha lefu la moena oa ka.

Motsoalle ea ratehang, keha ke tšerehane nakoana. E ne e le lefu la pele lelapeng la rōna. Empa ke batla hore ntho ea pele eo ke e nahanneng ke hore na ebe o ne a itokiseltse ho shoa. Ha ke retoloha ke sheba naha e tšebla, likeleli tsa theoha marameng a ka. Ka hopola kamoo re kileng ra sotleha 'moho re sa le bathoana re hula ka thata.

Re ea sekolong re sa ja hantle. Menoana e hloelisitse lieteng tsa rōna re tlameha ho apara lijase tse qhoaetsoeng holimo molaleng kaha re sa apara lihempe. Ka hopola mohla 'Mè a re tšoletseng liqhume tse 'maloa e le lijo tsa motšeare. Re sa je le bana ba bang. Re sa khone ho fumana lijo tse tšoanang le tsa bona. Re ne re potela ka leralla kamehla ho ea ja. Ke sa hopola

mohla re tšoletsoeng liqhume, ea ka re hlomphuoe. Ho ikholisa ho fumana karolo ea ka, ka thoba ka tsoa pele ho motšeħare o moholo ka tlatsa seatla pele moena a fumana karolo ea hae.

Eare ke sa eme mono ke shebile naha e tšeħla e libataolo tsa letsatsi ka nahana lintho tseo 'me ka ipotsa haeba Molimo a mo isitse tulong e molemo ho feta. Eaba Molimo o boela a mpitsa, empa ka temalo, ka leka ho e loantša.

Ka itokisetsa ho tla hae lepatong. Eareha Mor. McKinny oa Kereke ea Port Fulton, monna e kang ntate ho 'na, a rera lepato la hae a bua a re, "Ba ka ba teng mona ba sa tsebeng Molimo, ha ho le joalo, le Mo amohele joale." Oho ke ne ke fuparetse setulo sa k aka thata, Molimo o ne o boetse o sebetsa. 'Mali ea ratehang, ha A bitsa, u Mo arabe.

Ha ke lebale kamoo bathoana bao Ntate le 'Mè ba llileng kamora lepato. Ka batla ho khutlela Bophirima empa 'Mè a nqeka ho sala ka lumela haeba feela nka thola mosebetsi. Kapele ka thola mosebetsi ho Public Service Company ea Indiana.

Lilemo tse ka bang peli hamorao ha ke ntse ke hlahluba limetara levenkeleng la limetara mane Gas Works e New Albany, ka hahlameloa ke gase ka kulisoa ke eona liveke. Ka bonana le lingaka tsohle tseo ke li tsebileng. Ke sa hlaphoheloe. Ke jeoa ke esiti ea mala, e bakiloeng ke likamano le gase. Ea 'na ea eketsa ho mpefala. Ka isoa lingakeng tse ikhethang Louisville, Kentucky. Qetellong ba re ke lelana la ka 'me ke tlameha ho sehoa. Ke sa kholoe kaha ke eso utloe lehlaba lephakong la ka. Lingaka tsa tlaleha li sa t'lō hlola li nketsetsa letho pele ke sehoa. Qetellong ka e lumella ho etsoa ka mpa ka hatella tšebeliso ea sethethefatsi se bolaeang karolo eo feela ke tle ke shebelle oporeishene.

Oh, ka batla motho ea tsebang Molimo ho ema pela ka. Ke lumela thapelo ke mpa ke sa khone ho rapela. Eaba moreri oa First Baptist Church o a ea le 'na phaposing ea oporeishene.

Eitse ha ba ntlosa tafoleng ho ea moalong oa ka, ka ikutloa ke eketsa ho fokola le ho fokola ka linako tsohle. Pelō ea ka e batla e sa otle. Ka utloa lefu le nkaparetseng. Phefumoloho ea ka e eketsa ho khutsufala ka linako tsohle. Ka itseba ke fihlile



pheletsong ea tsela ea ka. Oh motsoalle ema hofihlela u fihla moo hang, u tla hopola lintho tse ngata tseo u li entseng. Ka itseba ke sa tsuba, ho noa kapa ka litloaelo tse sa hloekang empa ka itseba ke sa itlhophisetsa ho kopana le Molimo oa ka.

Motsoalle oa ka ha u le setho se fōfō feela se batang sa kereke, u tla tseba mohla u fihlang pheletsong hore ha u a itlhophisa. Haele pheto seo u se tsebang ka Molimo oa ka, ke u

kopa ho khumama hantle mona ka mangole a hao le ho kopa Jesu ho u fa boiphihlelo boo ba tsoalo ea bobeli, joalokaha a boleletse Nikodema ho Johanne khaolo ea 3, 'me oh mangenengene a thabo a tla lla hamonate. Ho rorisoe Lebitso la Hae.

Ha qala ha fifala ka phaposing ea kokelo, eka morung o moholo. Ka utloa moea o foka hara mahlaku, feela eka hole koana hara moru. Kea kholoa le utloile pululo ea moea o bululang mahlaku, e u atamela hanyane ka hanyane. Ka nahana, "Be, lena ke lefu le tlang ho nkuka." Oh! khele Moea oa ka o ne o til'o kopana le Molimo, ka leka ho rapela empa ke sa khone.

Moea oa utloahala o ntse o atamela, molumo o eketseha o bile o eketseha. Mahlaku a hlokohleha, eaba hang ho felile ka 'na.

Ea ka ke boetse ke moshanyana ea sa roolang lieta, ke eme tselaneng eo tlasa sefatse sona seo. Ka utloa eona Puo eo e itseng, "U se ke ua noa kapa ua tsuba." 'Me mahlaku ao kea utloileng e le oona ao kea utloileng a tsokotseha sefateng seo tsatsing leo.

Empa khetlong lena Puo ea re, "Ke u bitsitse 'me u hanne ho ea." Ea ipheta makhetlo a mararo.

Eaba ke re, "Morena, haeba e le Uena, ntumelle ho khutlela lefatšeng hape 'me ke tla rera Evangelie Hao ho tsoa marulelong a matlo le likoung tsa seterata. Ke tla bolella mang le mang ka eona!"

Hoba pono ena e fete, ka iphumana ke eso hlaphoheloe. Ngaka ea ka e ntse e le kahara moaho. A tla a ncheba 'me a hloletsoe. Eka o hopotse ke tla be ke shoele, eaba o re, "Ha ke monna ea tsamaeang kereke, tšebetso ea ka ke ea tonana, empa kea tseba hore Molimo o etetse moshanyana enoa." Hobaneng a itsalo, ha ke tsebe. Ha ho mang ea kileng a bua letho ka eona. Hola mohlang oo ka tseba seo ke se tsebang joale, nka be ke tsohile liphateng tseo ke hoeletsa Thoriso Lebitsong la Hae.

Ka mora matsatsi a 'maloa ka lumelloa ho khutlela hae ke mpa ke kula 'me ka tlameha ho roala ligalase ka baka la mahlo a lephekha. Hlooho ea ka e reketla ha ke shebile ntho nakoana.

Ka qala ka batla le ho fumana Molimo. Ka tloha kerekeng ho ea kerekeng, ke leka ho fumana nqalo e nang le memo ea aletare ea mehla ea khale. Ka bomalimame ha kea e fumana.

Ka re haeba nka fetoha Mokreste, ke tla ba oa makhonthe. Moreri ea nkuloileng ke rialo a re, "Joale Billy moshanyana, u khelohela bohlanyeng." Ka re ha nka fumana borapeli, ke batla ho bo utloa ha bo fihla, joaloka barutuoa ha ba entse.

Oh ho bokoe Lebitso la Hae. Hamorao ka fumana borapeli le joale ke sa bo tšoere, 'me ka thuso ea Hae, ke tla bo baballa kamehla.

Bosiu bo bong ka lapela Molimo le boiphihlelo ba mannte ka ba ka tsoela hokong ea khale ka mora ntlu 'me ka leka ho rapela. Ke sa tsebe ho rapela eaba ke qala ke qoqa le Eena joaloka motho ofe. Hang Leseli la kena ka hokong la taka sefapano 'me Puo e tsoang sefapanong ea bua le 'na ka leleme leo ke sa le utloisiseng. La ntoo ikela. Ke ne ke hloletsoe. Hoba ke iphumane ka boela ka rapela, "Morena haeba e le Uena, tloo u boele u bue le 'na hape." Esale ke bala Bibele ea ka ho tloha ke khutlile kokelong 'me ka bala ho I Johanne 4, "Baratuoa, le se ke la lumela meeaa eohle, le mpe le e leke hore ke ea Molimo na."

Ke tsebile moea o itlhahisitse ho 'na eaba o boela o itlhahisa ha ke rapela hape. Moeeng oa ka ea ka ho tlositsoe boima ba liponto tse sekete. Ka tlola ka mathela tlung 'me ea ka ke matha sebakeng.

'Mè a botsa, "Bill, u hlahetsoe ke'ng?" Ka arabela, "Ha ke tsebe empa ruri ke ikutloa ke thabile ke le bobebé." Ke sa khone ho lula ka tlung. Ka tlameha ho tsoa ke matha.

Ka tseba haeba Molimo a mpatlile ho rera, O tla mpholisa. Eaba ke etela kereke e lumelang ho tloloa ka ole 'me ka fola hang. Ka bona hoba barutuo ba ne ba fumane ntho e haellang bareri ba bangata kajeno. Barutuo ba ne ba kolobelitsoe ka Moea o Halalelang 'me ba khonne ho folisa bakuli ba etsa mehlolo e meholo ka Lebitso la Hae. Eaba ke qala ke rapella kolobetso ea Moea o Halalelang 'me ka e fumana.

Tsatsi le leng likhoeli tse ka bang tšeleta hamorao, Molimo oa mpha takatso ea pelō ea ka. A bua le 'na ka Leseli le leholo, ka bolelloa ho ea rera le ho rapella bakuli 'me O tla ba folisa ho sa natsoe maloetse a bona. Ka qala ka rera ke etsa seo A ntaetseng ho se etsa. Oh motsoalle, ha nka qala ka u bolella se etsahetseng: Mahlo a lifofu a buleha. Ba shoeleng litho ba tsamaea. Likankere tsa folisoa, ha ba ha etsoa mehlolo ea mefuta eohle.



Tsatsi le leng mosikong oa Seterata sa Spring, Jeffersonville, Indiana, ka mora tsoseletso ea liveke tse peli, ke ne ke kolobetsa batho ba 130. E le letsatsi le chesang la Phato 'me ho ena le batho ba 3,000. Ke ne ke itokisetsa ho kolobetsa motho oa 17 eaba hang ke utloa Puo e khutsitseng eo, e nyenyane hape e re, "Sheba holimo." Sepakapaka se batla se tšoana le borase tsatsing le chesang leo la Phato. Re sa ka ra fumana pula ea letho ka liveke tse ka bang tharō. Ka boela ka utloa Puo eo, eaba e bua khetlo laborarō e re "Sheba holimo."

Ka sheba holimo 'me sepakapakeng ha lePELLA naleli e khanyang e khōlō, eo nkileng ke e boning khafetsa pele ke mpa ke sa le bolella ka eona. Ke ne ke boleletse batho khafetsa ka ho hlaha ha eona ebe ba tšeha ba re, "Bill, u mpa u e akanya feela. Kapa e ka ba u ne u lora." Empa ho bokoe Molimo, khetlong lena keha A Ipontšitse pontšeng ea bohole, hoba keha e atametse hoo ke sa khonang le ho bua. Ka mora metsotsoana e 'maloa ka hooeletsa 'me batho ba bangata ba sheba holimo 'me ba bona naleli holima ka feela. Ba bang ba akheha ha ba bang ba hooeletsa 'me ba bang ba baleha. Eaba naleli e khutlela sepakapakeng 'me moo e thakhohileng e batla e le sebaka se boholo ba maoto a lisekoere tse leshome le metso e mehlano 'me sebaka sena sa fehleha se tsapola joaloka maqhubu a phethohang. Nqalong ena ha hlaha lerunyana le lesoue' 'me eaba naleli e nkuoa ke lerunyana lena.

Joaloka Johanne Mokolobetsi, moporofeta o ile a nètefatsoa ka hara metsi a Kolobetso.

Lipono li ile tsa tsoelapele. Basebetsi 'moho le eena ba tšebeletso ea bolisa ba tlalehile lipono tsa hae li sa tsoe ho Molimo. Ha thoe u laoloa ke moea o mobe. Taba ena ea mo hlopha hampe. Moroalo oa mo imela hofihlela o mo sita, eaba o kena lehoatateng ho batla Thato ea Molimo. A itetse hoo a bileng a ikana ho se khutle haeba a sa fumana karabo. Ke hona, ka hara motlotloana oa ho cheha mono, moo Lengeloi la Morena le mo fileng thomo ea hae. Hara lintho tse ling, Lengeloi le 'moleletse sena: "Ha u ka etsa hore batho ba u lumele, 'me ua tšepahala ha u rapela, ha ho letho le tla ema ka pela lithapelo tsa hao, esita le kankere."

Lipelaelo tsohle tsa nyamela. Joale keha a tšoere thomo 'me a tsoa ka sebete. Tsoseletso ea pholiso e ne e qalile.

Makholo a likete a ile a etela matšolo a Branham. Likete tsa folisoa ka Lebitso la Morena Jesu Kreste. Baevangeli ba bang ba kang Oral Roberts, T.L. Osborn, le A.A. Allen hang ba hlahlama Moena Branham 'me ba qala litsoseletso

tsa bona tsa pholiso. Morena a tšolla mahlohonolo a Hae kamoo ho esong ho etsoe pele. Letsoho le folisang la Jesu Kreste keha le boetse le amile batho ba Hae.

“Ke 'nile ka lliloa hangata ke thabo ka neo ea Molimo ea mora-rao ho kereke e leng ea moena oa rōna ea ratehang, William Branham, ka neo ea hae e babatsehang ea pholiso. Hoo ke hona ho sebetsa ha Molimo tse fetisang tse tlolisang hohle hoo re ka ho nahang (Baef. 3:20), hoba ha ke eso bone leha e le ho bala ntho efe feela e ka bapisoang le tšebeletso ea pholiso ea William Branham.”

Rev. F.F. Bosworth, moevangeli ea tummeng le e mong oa bontate bathei ba bolumeli ba Assemblies Of God esita le oa motsamao oa joale oa Pentekosta.

“Khetlo leng, ra mo shebella a buisana le monna ea robetseng moalong. Pele ea ka monna eo ha a arabele ka kutloisiso. Eaba mohatsae ea haufi o a hlalosa, ha thoe monna o na sa bolaoe ke kankere feela, empa ke setholo se sa utloeng se sa bueng.

Eaba Moena Branham o re ho tla ba bohlokoa ho monna ho utloa a tle a mo laele mabapi le pholiso ea kankere ea hae. Ha etsoa thapelo ea nakoana. Hang monna a khona ho utloa! Marotholi a maholo a likeleli a rotha marameng a monna eo sefahleho sa hae esale se pompetse se tšerehane. A mamela toelo ea hae ea kankere ka thahasello e tebileng.”

Rev. Gordon Lindsay, mongoli oa makhonthe, moreri, le mothei oa Christ For The Nation Institute.

“Moena Branham a re, ‘Monna oa Mokonkrese o folile.’ Pelō ea ka ea tlolaka. Ka tsoa ka amohela Morena joaleka Mofolisi oa ka. Ka beella

melangoana ea ka kathoko...eaba bokatlase ba Leholimo bo horometseha fatše!"

William D. Upshaw, Mokonkrese oa US (1919-1927), moikèti oa Botonakhôlô ba US ka 1932. O holofetse bongoaneng mohla a robehang mokokotlo. O folisitsoe ke lithapelo tsa Moena Branham a le lilemo tse 84, kamora ho holofala lilemo tse 66. Ha eso hloke setulo sa bakuli kapa melangoana bophelo bohle ba hae.

"Ke ne ke kakalalitsoe ke T.B. ka mokokotlo lilemo tse robeli le likhoeli tse robong ke tetsoe ke lingaka. Boima ba ka bo fihla ka thata ho liponto tse 50 'me tšepo eohle ea ka e nyametse. Eaba Jeffersonville, Indiana, ho tsoa Mor. WM Branham ka pono ea konyana e tšoasitsoeng lefeelleng e lla e re 'Milltown' e leng moo ke ahileng teng. Moena Branham ha eso fihle mona kapa ho tsejoa ke mang ea tsoang mona. Ha a kena, a mpea matsoho a nthapella, a ntse a bitsa holima ka Lebitso la Morena Jesu oa rôna ea ratehang. Ea ka ke tšoaroa ke ho hong 'me hang ka ema ka leboha Molimo ka matla a Hae a ho folisa. Hajoale ke seletsi sa piano kerekeng ea Baptise mona."

Georgia Carter, Milltown Indiana, Indiana, ea folisitsoeng T.B. e bolaeang ka 1940 'me le joale ha eso tšoaroe ke boloetse boo le ka letsatsi bophelong ba hae. O emetse mashome a likete tsa batho ba folisitsoeng ke tšebetso ea hae 'me le kajeno ba sa ntse ba folisoa.

TOPALLO EA MOLLO

Ke khafetsa Moena Branham a hhalosa tšobotsi ea Topallo ea Mollo e nètefalitseng tšebetso ea hae. E hlahile tsoalong ea hae, e bonoe ke likete lebopong la Noka ea Ohio, 'me e bonahala e mo latetse hohle moo a ileng teng. Eaba ka 1950 Morena o nea balumeli le bomosalumele bopaki bo sa tlaileng ba hoba Topallo ena ea Mollo e tsamaea le moporofeta.



Bosiu bo ne bo tinkelitsoe bo pupelitsoe ke ngangisano mane Sam Houston Coliseum. Moena Branham o ne a eteletse tsoseletso ea pholiso e haolang naha pele. Mahlohonolo a Morena Jesu a ne a tšolohela holima masimo a koro ea moea joaleka pula. Empa lipontšo tse khōlō le meeka tsa teeloa hare ke bosomi. Joale le kamehla, sera sa tsosa mohanyetsi. Mara a mabeli ao a kopanela Houson Texas, 'me Lengeloi la Morena ka Bolona la theoha ho loana ntoa.

Likete li se li phuthehile ho bona mehlolo e sa baloeng e teetseng monna enoa oa Molimo hare. Letsatsi pele ho moo, sehlopha sa bareri ba lehae sa phephetsa moporofeta ngangisanong ea pholiso ea Khalalelo, empa eaba lotho ea phephetso e oela holima molekane oa hae oa khale ea tšepehang, Moruti F.F. Bosworth. Moetapele oa basēholli ba bangata bana e le moreri oa lehae oa Baptise eena e le moferekanyi ea itlatlarietsang oa pholiso ea Khalalelo. Ngangisano e hlahlamang ea nyenyelepa ea kena maseling a litaba,

tsona tsa phatlalatsa litaba tsa sehlooho, “*Moehete Oa Thutabomolimo O Tlil'o Fefoha Kajeno Ka 7 p.m Kahara Sam Houston Coliseum.*”

Eaba baseholli ba lefa ralitšoantšo oa profeshene, Ted Kipperman eena e le oa Douglas Studios, ho porota ngagisano. Mantsiboea ao, ha katlatsoa lifoto tsa Moena Bosworth a eme ka boikokobetso nakong eo mobelaeli a emeng meèmo ea nyeliso; ka nako e 'ngoe a tsokotsa monoana oa hae sefahlehong sa monnamoholo ea ithobileng eo.

Etseha ngagisano e qala, Moruti Bosworth a chaella bonnete ba pholiso ea Khalalelo ka bopaki ba Mangolo eaba, hore a se hlore a siea potso, o kopa bohle ba folisitsoeng lipabo tsa bona ho ema. Likete tsa ema ka maoto a tsona. Hoba ba folisitsoeng ba lule litulong tsa bona, a kopa bao bohle ba folisitsoeng ka Khalalelo e beng e le maloko a bolumeli ba monna enoa e leng maloko a tšepehang ho ema ka maoto. Litho tse makholo a mararō tsa ema ka sebete li pepesa mohau oo Morena Jesu a ba bontšitseng ona.

Phephetso ea hlaha ho mobelaeli. “E reng mofolisi eo oa Khalalelo a tle. E reng a sebetse.” Moena Bosworth a hlakisa Jesu e le eena feela Mofolisi oa Khalalelo, empa lithorèlo tsa moreri tsa toota. Qetellong, Moena Bosworth a memela Moena Branham kalaneng. Eaba o amohela memo a teetsoe hare ke litlatse tse mo tšeheletsang.

Eaba moporofeta, ea tletseng Moea o Halalelang, o arabela tjena:

Ha ke khone ho folisa mang. Ke bua sena. Mohla ke ne ke tsoalloa holimo Lebatooeng la Kentucky ke sa le lesea, ho latela 'mè oa ka ea ratehang, etsoe taba eo e nèpahalitsoe bophelo ba ka bohle, Leseli le kene phaposing eo ea khale e nyenyane ea mopatisane, e hahiloe mono, e sa liloa fatše, e se na le fesetere, ba mpa ba betlile nthoana ea khale mono e le fesetere, e kang lematinyana, 'me ba e bula e ka ba hora ea bohlano hoseng, eaba Leseli lena le likoloha le kena ha letsatsi le se le tla chaba. Ho tloha mohlang oo, Le tsamaile le 'na kamehla. Ke



Lengeloi la Molimo. Le kopane le 'na ka namana lilemo tse 'maloa tse fetileng. Ho theoha joalo bophelong ba ka, O mpoleletse lintho tse hlahileng, ka li bua ho latela polelo ea Hae. 'Me ke phephetsa mang nqa efe, ho etela motse oo ke holetseng ho ona, kapa nqa efe, moo tlaleho e kileng ea etsoa ka Lebitso la Morena, e sa ka ea hlaha hantle kamoo e boletseng e tla hlaha.

Hoba a bue mantsoe ao, Moea o Halalelang oa tšolohela holima kalana, 'me ralifoto ea mahlahlaha eo a katlatsa senepe. Moena Branham a tloha kalaneng ka polelo e bobebe, feela e le ea boporofeta: "*Molimo o tla paka. 'Na ha ke sa tla bua.*"

Motlatsi oa Mong. Kipperman a potlaka ho hlatsoa linepe bakeng sa litaba tsa hoseng ho hlahlamang. A holloa ho elelloa ntho e sa tloaeleheng hoba a ntše foto ea pele motsoakong o hlatsaang. Eona, joaleka lifoto tse ling tse hlano tse latelang, keha li sa hatisa. A kakatlela pelō ea hae eaba o kolumela pele ha a ntša khatiso ea ho qetela motsoakong o hlatsaang. Mono, holima foto eo ea ho qetela, keha Topallo ea Mollo e larile holima hlooho ea moporofeta oa Molimo, William Marrion Branham.

Bana ba Israele ba bone Topallo ea Mollo e eteletse Moshe pele, le bana ba letsatsi lena la sejoale ba bone eona Topallo eo ea Mollo e eteletse moporofeta e mong pele.

Foto ea fetisetsoa ho George J. Lacy, Molekoli Le Setsebi sa Litokomane tse Belaetsang oa U.S. F.B.I., ea chaeletseng senepe ka mohopolo le ka botsebi ba hae. Tokomane ea semolao e hlophisitsoeng ke Mongh. Lacy e lehlakung le latelang.

Mona ke khale le pele likhomputara kapa likhamera tsa digitale li fihla, 'me li ke ke tsa hlaloosa ka mekhoa eseles e tsejoang ke mahlale a saense, haese feela hore Leseli la mannete le hlahile holima hlooho ea William Branham. Kajeno eona foto eo e bonoa Laeboraring Ea Konkrese ea Linaha tse Kopaneng, hona motsemoholo oa na, Washington DC.

George J. Lacy
Moklahlobi wa Ditokomane tse Botswana
Moako wa Shell
Houston, Texas

Pherekong 29, 1950

T LALEHO LE MOHOPOLO

Ho latela: Neketifi e Botswana

Ka Pherekong 28, 1950 ho latela kopo ya Moruti Gordon Lindsay ya neng a emetse Moruti William Branham wa Jeffersonville, Indiana, ke ke ile ka amohela ho tswa Setudiong sa Douglas se mane 1610 Rusk Avenue mona motseng, filimi ya foto e boholo ba di-inchi tse 4x5 e katladitsweng le ho hlatsuwa. Ho bolelwa ha filimi ena e nkilwe ke ba ha Setudio sa Douglas sa Moruti William Branham mane holong e kgolo ya Sam Houston motseng mona, mehleng ya ketelo ya hae mona ho ella mafelong a Pherekong, 1950.

K O P O

Moruti Lindsay o nkopile ho etsa tlhahlobo ya mahlale hodima neketifi e boletsweng pejana. O nkopile ho rera ka ho tiya, holane ho ka etswa, hore na kapa tjhe ho latela mohopolon wa ka neketifi e ile ya angwa leha e le ho "sebetswa" jwang kapa jwang, pejana filimi e hlatsuwa, ho ka bakang hore motaka wa lesedi o bonahale mokgweng wa sedikadikwe hodima hloho ya Moruti Branham.

T L H A H L O B O

Tlhahlobo ya mahlo le ya dilense tse ntjhotjho le patlisiso e entswe bokahodimong bo tletseng mahlakoreng bobedi a filimi, eo e neng e le Filimi ya mofuta wa Eastman Kodak Safety. Mahlakore bobedi a filimi a hlahlobilwe tlaša lesedi la maqhubu a tlhotlilweng ka ho feta ha nkwa le difoto tsa filimi ka mokgwa wa ho kgantsha masedi a natlafetseng.

Tlaleho le Mohopolo - Leqephe la 2 - Pherekong 29, 1950

Tlhahlobo ya dilense tse ntjhotjho e sitilwe ho senola ho angwa ha filimi tulong efe kapa efe feela ho latela mehato e sebedisetswang ntlafatso morerong wa papatso. Hape, tlhahlobo ya dilense tse ntjhotjho e sitilwe ho senola pherekanyo efe kapa efe ya diphalli tse alatsang filimi kahare leha e le ka nnqa tsohle tsa motaka o amehang wa lesedi.

Tlhahlobo ya lesedi la maqhubu a tlhotlilweng ka ho fetisa e sitilwe ho senola ntho efe kapa efe feela ya mokenella, kapa tholwana e bakilweng ke diketsahalo tsa dikhemikale mahlakoreng bobedi a neketifi, tseo e neng e ka ba sesosa sa motaka wa lesedi, pejana ho hlatsuo ya neketifi.

Foto e nkilweng ka mokgwa wa ho kgantsha mahlasedi a natlafaditsweng le yona e sitilwe ho kunutolla ntho efe kapa efe e ka supang ho etswa ha ntlafatso ya letho filiming.

Tlhahlobo hape e sitilwe ho senola ntho e ka supang ha neketifi e amehang e ne e le neketifi e tswakaneng kapa neketifi e katladitsweng habedi.

Ha ho a fumanwa letho le neng le ka supisa ha motaka o amehang wa lesedi o entswe nakong ya mehato ya hlatsuo. Le jwalo ha ho a fumanwa letho le neng le ka supisa ha e sa ka ya hlatsuwa ho latela tsamaiso ya molao le e tsebahalang. Ha ho letho le fumanweng ha ho bapiswa dibakeng tse patahaneng tse bontshang lesedi le sa ka la dumellana.

M O H O P O L O

Ho latela tlhahlobo e hlahlositsweng ka hodimo le patlisiso ke mohopolo wa ka o tiileng hore neketifi e tlisitsweng ho hlahlojwa, ha e a angwa le hona e be e se neketifi e kopaneng kapa e katladitsweng habedi.

Hape, ke mohopolo wa ka o tiileng hore motaka wa lesedi o bonahalang hodima hloho mokgweng wa sedikadikwe o bakilwe ke lesedi le otiligeng neketifing.

E abilwe ka tlhompho,



LIPHIRI LI SENOTSOE

Ha hlaka mathoasong a tšebetso ea Moena Branham hobane tsamaiso ea bolumeli e bopetsoe ho bapatsa e thaotela mekhatlo ea borapeli, 'me e seng Evangelia ea makhonthe. Moena Branham o ne a lumela Bibele Lentsoe ka Lentsoe, a sa batle ho tenyetseha, leha a ka qheloa ke bomphato ba hae, metsoalle, kapa ba leloko.

Mohla e leng setho sa Missionary Baptist Church, a laeloa ho tlotsa bareri ba basali. Leha ho le joalo, o ne a tseba Mangolo 'ohle hantle haholo. I Timothea 2:12 e bua phatlalatsa e re, "*Ha ke lumelle mosali ho ruta, kapa ho laola monna, ha e se ho ikhutsetsa,*" le I Bakorinthe 14:34 e re, "*Basali ba lona ba khutse likerekeng: hobane ha ba lumelloe ho bua...*" Ena e se taba e khahlano le basali, empa Bibele keha e takiloe ka botšo le ka bosoeu ka taba eo. Hoba makhaolakhang a fhile, a hana ho tenyetseha eaba o ngala kereke.

E se lona feela Lengolo le nyemotsoang ke mekhatlo ea malumeli. Morena a senolela Moena Branham 'nete ea kolobetso. Jesu o be a ka laela joang, "*E-eang ke hona, le rute lichaba tsohle, le ba kolobetse ka lebitso la Ntate, le la Mora, le la Moea o Halalelang,*" athe kolobetso eohle e ngotsoeng Bibeleng e tlide ka Lebitso la Jesu? Moapostola Petrose o laetse ho Liketso 2:38 ho ***baka le ho kolobetsoa ka Lebitso la Jesu Kreste.*** Mangolo a sebetsa ka kutloano e phethehileng, empa ho nkile moporofeta ho senola sephiri sena: "Ntate" ha se lebitso, "Mora" ha se lebitso, le "Moea o Halalelang" ha se lebitso. Monna ka mong le eena ke ntata bana ba hae, mora oa batsoali ba hae, le moena oa mafahla a habo, koana lebitso la hae ha se "ntate," "mora," kapa "moena." Ntate, Mora, le Moea o Halalelang ke litlotla

tsa Lebitso la Jesu Kreste. Mattheu 28:19 le Liketso 2:38 ba ne ba hlophisitsoe ka ho phethahala.

Ho bile ha senoloa sebe sa mantlha Tsimong ea Edene, ha ho a jeoa tholoana, empa ke ntho e harolang letsoalo ho feta moo. Ho ja sekotoana sa tholoana ho ka senolela Adama le Eva ka potlako e kalo bofeela ba bona joang? Ha e etse kelello. Apole e amana kae le bofeela? Moprefeta oa Molimo o senotse sephiri sena ka ho hlaka.

Mangeloi a boletsoeng ho Tsenolo khaolo ea 2 le 3 e ne e le bomang? Mabitso a ona a tsebahala ha u ka a utloa.

Bakalli ba hlollang ba lipere ba ho Tsenolo khaolo ea 6 ke bomang? Ba na le ntlha e le 'ngoe ea bohloko ea kopanelo.

Na ho buuoe ka Linaha tse Kopaneng kahara Buka ea Tsenolo?

Ba bolokehileng ba 144,000 khaolong ea 7 e ne e le bomang?

Seotsoa se seholo sa khaolo ea 17 ke mang? Boitsebiso ba sona le liphiri tsena tsohle li senotsoe Molaetseng oa moporofeta enoa oa senatla ea ronngoeng ke Molimo.

Mona enoa o ne a sa teeloa hare ke meeka e sa baloeng feela, empa le liphiri tseo esale li kubutoa kahara Bibebe mengoaheng li senotsoe tshetsong ea hae. Ha hla ha hlaka hore moporofeta enoa o phethahalitse Mangolo a mangata ho feta Malakia 4.

Tsenolo 10:7: Empa mehleng ea lentsoe la lengelo la bosupa, ha terompeta ea lona e tla lla, ke moo sephiri sa Molimo se tla phetheha, kamoo o boleletseng bahlanka ba 'ona baporofeta kateng.

Lentsoe le hlabela lefatše mokhosi ho tsoa mekhatlong ea malumeli le ho khutlela Lentsoeng la Molimo la mantlha. Mang le mang oa rōna o filoe monyetla oo Petrose, Jemese, le Johanne ba o fumaneng. Re na le monyetla oa ho balloa le bakhethoa

ba Molimo ba 'maloa ba sa tlo khumamela mekhatlo ea marapeli a letsatsi lena.

Lengolo le Halalelang le ngola ka maphelo le ka liketso tsa banna ba tsamaileng le Molimo 'me ba ne ba tlotsitsoe ke Moea oa Hae hoo ba ileng ba hlahisa HO RIALO MORENA, 'me mantsoe a bona a thasisetsoa ke lipontšo le mehlolo. E ne e le baporofeta ba Molimo, le Puo ea Molimo molokong oa bona.

Na ebe joale linako li fapane le mohla Jesu a ne a le mona? Baetapele ba borapeli ke bona ba Mo thakhisitseng. Barutua e ne e le sehlotšoana sa paloana hara tsamaiso e khōlō ea borapeli. Ba ile ba qheloa, ba songoa, 'me qetellong ba bolaoa ka ho hanelo tsamaiso ea mekhatlo ea molapo o moholo oa bolumeli. Kajeno ha re bolaeloe litumelo tsa rōna, empa re hlile rea hlorisoa. Joaleka Bafarasi le Basadusi, ba sitoa ho latola mehlolo e neng e teetse tšebetso ea Moena Branham hare ka hona ba itlhommella ka litlhaselo tse ling. Le ka utloa ho thoe e ne e le moporofeta oa bohata, moetapele oa mekha, kapa hampe ho feta. Bonneteng, e ne e le monna ea ikokobelitseng oa Molimo a eme ka thata khahlano le taolo e sa fuparolleng seatla ea mekhatlo ea malumeli le ea mekha holima batho ba Molimo. Ba futuhetse Jesu joalo mohla A na hanelo litšomo tsa bona le meetlo.

Molimo o hlomphile boikitlaetso ba Moena Branham ba ho lumela Lentsoe ka leng kahara Bibele, 'me O sebelisa tšebetso ea hae ho tataisetsa mee a limilione ho Jesu Kreste. Kajeno, Puo ea Lengeloi la Bosupa e utloahala hantle ho feta kamoo E kileng ea etsa. Batho ba ka bang limilione tse peli lefatše bophara ba lumela Molaetsa oa Moena Branham. Ekaba paloana e nyenyane papisong

le libilione tse peli tse ipolelang Bokreste, empa ke neng mohla batho ba Molimo e neng e se paloana e nyenyane?

Re fumana ho hatisitsoe lithero tse fetang 1,200 tsa Puo e neng e porofetoe ke Tšenolo 10:7 ho fihla. Thero e 'ngoe le e 'ngoe e notlolla liphiri tsa Molimo. U ka fumana Puo eo haeba u ikemiselimse ho E utloa.

KHETHO KE EA HAO

Le ka motsotso o le mong ha nke ke tlisetsa batho molaetsa hore ba tle ba ntatele, kapa ho ngolisa kerekeng ea ka, kapa ho qala kopano e itseng le mokhatlo. Ha ke eso ho ka ke etsa hono 'me nke ke ka etsa hono joale. Ha ke na thahasello linthong tseo, empa ruri ke na le thahasello linthong tsa Molimo le ho batho, 'me ha feela nka phetha ntho e 'ngoe ke tla khotsofala. Ntho e le 'ngoe eo ke ho bona ho theiloe kamano ea 'nete ea moea pakeng tsa Molimo le batho, moo batho ba fetohang libopuaa tse ncha ho Kreste, ho tlatsoa ka Moea oa Hae le ho phela ho latela Lentsoe la Hae. Ke tla mema, ke pheelle le ho lemosa bohole ho utloa mohoeletso oa Hae nakong ena, le ho neelana ka maphele a lona ho Eena ka botlalo, etsoe ke tšepa pelōng ea ka hore ke neelane ka botho bohole ba ka ho Eena. Molimo a le hlohonolofatse, 'me ho tla ha Hae ho ke ho thabise pelō tsa lona."

Rev. William Marrion Branham

LIQOTSO

JESU KRESTE KE MOLIMO (BOMOLIMO)

EXOD 20:3	U se ke ua ba le melimo e meng pela sefahleho sa ka.
ESA 9:6	Hobane re tsoaletsoe ngoana, re neiloe mora: borena bo beiloe lehetleng la hae: 'me u tla bitsoa Moeletsi, Ea makatsang, Molimo o Matla, Rabosafeleng, Morena oa Khotso.
MATT 1:23	Bonang, moroetsana o tla emola a tsoale mora, 'me lebitso la hae o tla bitsoa Emmanuel, ke hore ha ho fetoloa, Molimo o na le rôna.
JOHANNE 1:1	Lentsoe le ne le le tšimolohong, 'me Lentsoe le ne le le ho Molimo, 'me Lentsoe e ne e le Molimo.
JOHANNE 1:14	Lentsoe le ne le etsoe nama, 'me la aha hara rôna, ('me re bohile khanya ea lona, e kang khanya ea mora a 'notši ea tsoang ho Ntate,) le tletse mohau le 'nete.
JOHANNE 4:24	Molimo ke Moea: ba o rapelang e ka khona ba o rapele ka moea le ka 'nete.
JOHANNE 5:43	'Na ke tlile ka lebitso la Ntate, 'me ha le nkamohele: ekare ha e mong a etla ka lebitso leo e leng la hae, feela eena le tla mo amohela.
JOHANNE 8:19	Eaba ba re ho eena, Ntatao o kae? Jesu a araba a re, Ha le ntsebe, ha le tsebe le Ntate: hoja lea ntseba, le ka be le tseba le Ntate.
JOHANNE 10:30	'Na le Ntate re bang.
JOHANNE 12:45	Ea ntalimang o talima ea nthomileng.
JOHANNE 14:8-9	Filipi a re ho eena, Morena, re bontše Ntate, e tla ba ho re lekane. Jesu a re ho eena, Ke lutse le lona nako e kalo, 'me ha u a ka ua ntseba, Filipi na? ea mponeng o bone Ntate; 'me u ka rialo joang ha u re, Re bontše Ntate?
JOHANNE 20:28	Thomase a araba a re ho eena, Morena oa ka le Molimo oa ka.
LIKETSO 2:36	Ka baka leo ntlu eohle ea Israele e ke e tsebe kannete, hobane Jesu eo le mo thakhisitseng, Molimo o mo entse Morena le Kreste.
LIKETSO 9:4-5	A oela fatše, a utloa lentsoe le reng ho eena, Saule, Saule, u ntlhorisetsang na? A re, U mang, Morena? Morena a re, Ke eena Jesu eo u mo hlorisang: ho thata ho uena ho raha litsenene.
BAEF 4:5	Morena o mong, tumelo e 'ngoe, le kolobetso e 'ngoe,
BAKOL 1:13-17	'Me u re ntšitse matleng a lefifi, oa re falletsa 'musong oa Mora oa oona ea ratoang: Eo re nang le topollo ka mali a hae, e leng tšoarelo ea libe: Ke eena e leng setšoantšo sa Molimo o sa bonoeng, letsibolo la tsohle tse hloliloeng: Hobane ka ho eena ho hloliloe tsohle, tse maholimong, le tse lefatšeng, tse bonoang le tse sa bonoeng, leha e le literone, leha e le marena, leha e le lihlooho, leha e le mebuso: tsohle li hloliloe ka eena, 'me li hloletsoe eena: Ke eena ea leng kapele ho lintho tsohle, 'me tsohle li eme ka eena.

BAKOL 2:6-9	'Me joalokaha le amohetse Morena Jesu Kreste, le fele le tsamaee joalo ho eena: Le ntse le tebisa metso ho eena, le theoa ka ho eena le tiea tumelong, joalokaha le rutiloe, le ntse le tletse teboho. Itebeleng motho a se ke a le hulanya ka bohlale ba batho le ka mashano a lefeela, ka ho ea ka lithuto tseo batho ba neanang tsona, ka ho latela litaba tsa qalo tsa lefatše, e seng Kreste. Hobane botlalo bohole ba bomolimo bo ahile ho eena ka 'mele.
BAHEB 13:8	Jesu Kreste e ne e le eena maobane, e sa le eena le kajeno, 'me e tla 'ne e be eena ka ho sa feleng.
I JOHANNE 5:7	Hobane ho le ba bararō bao e leng lipaki leholimōng, Ntate, Lentsoe, le Moea o Halalelang: 'me ba bararō bana ke ntho e le 'ngoe.
TŠEN 1:8	Ke 'na Alfa le Omega, qalo le qetello, ho bolela Morena, ea leng teng, ea neng a le teng, ea tla 'ne a be teng, ea Matlaohle.

(KOLOBETSO EA METSI)

MATT 28:19	E-eang ke hona, le rute lichaba tsohle, le ba kolobetse ka lebitso la Ntate, le la Mora, le la Moea o Halalelang:
MAREKA 16:16	Ea lumelang 'me a kolobetsoa o tla bolokeha; empa ea sa lumelang o tla tsuoia.
LIKETSO 2:38	Petrose a re ho bona, Bakang, 'me e mong le e mong oa lona a kolobeletsoe ka lebitso la Jesu Kreste tšoareleng ea libe, 'me le tla nka neo ea Moea o Halalelang.
LIKETSO 4:12	'Me ha ho poloko ho e mong: hobane ha ho lebitso le leng tlassa leholimō leo batho ba le neiloeng, leo re ka bolokehang ka lona.
LIKETSO 8:12	Empa eitse hobane ba lumele Filipi eaba bolellang litaba tsa 'muso oa Molimo, le lebitso la Jesu Kreste, banna le basali, ba kolobetsoa.
LIKETSO 19:3-5	A re ho bona, Le kolobelitsoe ka kolobetso efe? Ba re, Ka kolobetso ea Johanne. Pauluse a re ho bona, Efèla Johanne o kolobelitse ka kolobetso ea pako, a bolella batho hore ba lumele ho ho ea tläng kamora hae, e leng, Kreste Jesu. Eitse ha ba utloa hoo, ba kolobetsoa lebitsong la Morena Jesu.
BAEF 4:5	Morena o mong, tumelo e 'ngoe, kolobetso e 'ngoe.
BAKOL 3:17	Me seo le se etsang leha e ka ba eng le eng ka ho bua kapa ka ho sebetsa, le etse tsohle ka lebitso la Morena Jesu, le ntse le leboha ka eena Molimo Ntate.

LIQOTSO

BAPOROFETA

NUM 12:6	A re, Mamelang mantsoe a ka hantle: Moporofeta ha a le teng hara lona, 'na JEHOVA ke ipontša ho eena ka pono, ke bua le eena ka toro.
DEUT 18:21-22	Ekare ha u re pelōng ea hao, Na re tla khetha joang lentsoe le sa kang la boleloa ke JEHOVA? Ke re etlare moporofeta eo ha a bolela taba ka lebitso la JEHOVA, 'me taba e boletsoeng ke eena e sa hlahe, e sa etsahale, ke taba eo JEHOVA a sa kang a e bolela, moporofeta eo o e boletse ka boikhohomoso: se mo tšabe.
I LIKRON 16:20-22	Ba ntse ba phanyaphanya hara lichaba, le mebuso le merabe; Empa ha a ka a lumella motho ho ba tuba: e, 'me a laea marena ka baka la bona, A re, Se ameng batlotsuo ba ka, 'me le se ke la etsa baporofeta ba ka hampe.
LIPES 105:12-15	Enere ba eso ho be bakae; e, ba sa fokotse, e sa le basele ho lona. Ba ntse ba sepela le lichaba le mebuso le merabe; Ha a ka a lesa motho ho ba tuba; e, a laela marana ka baka la bona; A re, Le se ke la etsa baporofeta ba ka hampe.
AMOSE 3:7	Hobane Morena MOLIMO ha a etse letho, a eso ho senole morero oa hae ho bahlanka ba hae baporofeta.
MAL 4:5	Bonang, ke ea le romela moporofeta Elia ho eso ho tle letsatsi la JEHOVA le leholo le tšabehang:
LUKA 1:70	Joalokaha a ne a boletse ka molomo oa baporofeta ba hae, ba bileng teng mehleng ea pele:
LUKA 24:25	Eaba o re ho bona, Jo batho ba se nang kutloisiso, ba pelō e liehang ho lumela tsohle tse boletsoeng ke baporofeta:
LIKETSO 7:52	Ke ofe moporofeta eo bontata lona ba sa kang ba mo hloris? ba bile ba bolaile le ba boletseng pele ho tla ha Ea Lokileng; eo le mo ekileng joale eo le leng babolai ba hae:
LIKETSO 24:14	Seo nka ipolelang ho uena ka sona ke sena, ha e le thuto eo ba reng ke thuto e khoelohileng, ke fela ke sebeletsa Molimo oa bontate ka eona, ke ntse ke lumela litaba tsohle tsa molao le tse ngoliloeng baporofeteng:
BAEF 2:20	Le mohaho o theiloeng holima motheo oa baapostola le oa baporofeta, oo Jesu Kreste e leng eena lejoe la nthla la oona;
BAHEB 1:1-2	Molimo, ha o ne o buile hangata mehleng ea khale le ka mekhoa e mengata le bontata rōna ka baporofeta, Joale mehleng ena ea qetello o buile le rōna ka Mora, eo o 'meileng mojalefa oa ntho tsohle, eo hape o entseng ka eena tse bopiloeng kaofela;

MEHLOLO/PHOLISO EA KHALALELO

DEUT 26:8	JEHOVA a re ntša Egepeta ka letsoho le matla, le ka letsoho le otlolohileng, ka letsoso le leholo, ka lipontšo, le ka mehlolo:
BAAHL 6:13	Gideone a re ho lona, Oho Monghali, ha ekaba JEHOVA a ena le rōna, tseo tsohle li re hlaheletseng? e kae mehlolo ea hae kaofela eo bontata rōna ba re boleletseng eona, ba re, Na hase JEHOVA ea re nyolotseng Egepeta? joale JEHOVA o re furaletse, o bile o re neetse matsohong a Bamidiane.
LIPES 103:3	Ke eena ea tšoareleng makhopo a hao oohle; ea folisang maloetse a hao kaofela;
ESAIA 53:5	Athe o hlabetsoe libe tsa rōna, a tetekoa ka baka la makhopo a rōna: kotlo e re tlisetsang khotso e mo oetse holimo; 'me re pholosoa ke maqeba a hae.
DANIEL 11:32	Ka liqeko tsa hae o tla hulela ba tlolang selekane bokoenehing: empa sechaba sa ba tsebang Molimo oa bona se tla tiea, se sebetse.
MAREKA 16:17-18	Mehlolo e tla tsamaea le ba lumelang ke eona ena; Ba tla leleka batemona ka lebitso la ka; ba tla bua lipuo tse ncha; Ba tla tšoara linoha; 'me leha ba noele ntho e ka ba bolaeang, ha e ka ke e aba etsa letho; ba tla bea matsoho holima ba kulang, 'me ba tla fola.
JOHANNE 14:12	Kannete, nete, ke re ho lona, Ea lumelang ho 'na, mesebetsi eo ke e etsang o tla e etsa le eena; o tla etsa le e fetisang ena; kahobane ke ea ho Ntate.
LIKETSO 19:12	Esita lituku le masela a neng a amile 'mele oa hae, a ne a beoa holima ba kulang 'me maloetse a ne a ba tlohela, le meea e mebe e ne e tsoa ho bona.
I BATHES 1:5	Hobane evangeli ea rōna ha e a ka ea tla ho lona ka lipolelo feela, empa e tile le ka matla, ka Moea o Halalelang, le ka kholiso e khōlö; joalokaha le tseba seo re bileng sona ha heno ka baka la lona.
JAKOBO 2:18	Empa, e mong o tla re, Uena u na le tumelo, 'na ke na le mesebetsi: mpontše he tumelo ea hao ho se mesebetsi, 'me 'na ke tla u bontšā tumelo ea ka ka mesebetsi ea ka.
JAKOBO 2:20	Motho oa lefeela, na u ka rata ho tseba, hobane tumelo e se nang mesebetsi e shoele na?
JAKOBO 5:14-15	Empa e mong hara lona ha a baba? a bitse baholo ba kereke; 'me ba mo rapelle, ba ntse ba mo tlotsa ka ole ka lebitso la Morena: 'Me thapelo e entsoeng ka tumelo e tla pholosa mobabi, 'me Morena o tla mo tsosa liphateng; 'me ekare ha a entse libe, o tla tšoarelaoa tsona.
JAKOBO 5:16	Bolellanang litšito tsa lona, 'me le rapellane, le tle le fole. Thapelo ea ea lokileng e na le matla a maholo ho sebetseng ha eona.
I PETROSE 2:24	Eena ea jereng libe tsa rōna 'meleng oa hae sefapanong, hore, re shoe ka nqa ea libe, re tle re phelele ho loka: eo le folisitsoeng ka matetetso a hae.

LIQOTSO

MOEA OA ELIA

II MARENA 2:15	Bara ba baporofeta ba Jeriko ba neng ba eme mabapa le teng ha ba 'mona, ba re, Moea oa Elia o lutse holima Elisha. Ba tla ba mo khahlanyetsa, ba inama fatše pela hae.
ESAIA 40:3-4	Lentsoe la ea hooang feelleng le re, Hlekang tsela ea JEHOVA feelleng, le latse 'mila oa Molimo oa rōna nahathote. Liphula tsohle li katoe, lithaba kaofela le maralla oohle a kokobetsoe: libaka tsohle tse litutulu li batalatsoe, hohle moo ho leng makukuno ho latsoe:
MAL 3:1	Bonang, ke a roma lengosa la ka, le tle le hleke tsela pela ka: 'me hang Morena, eo le 'matlang, o tla kena tempeleng ea hae, e leng lengeloi la selekane, leo le le lakatsang: bonang, o a tla, ho bolela JEHOVA oa makhotla.
MAL 4:5-6	Bonang, ke ea le romela moporofeta Elia ho eso ho tle letsatsi la JEHOVA le le leholo le tšabehang: O tla busetsa lipelō tsa bontate ho bara ba bona, le pelō tsa bara ho bontata bona, hore ke se tšohe ke etla 'me ka otla lefatše ka ho le timeletsa.
MATT 11:10 (Mareka 1:2, Luka 7:27)	Hobane ke eena, ea boleloang moo ho ngoliloeng, Bona, ke roma pela sefahleho sa hao lenqosa la ka, le tlang ho u lokisetsa tsela.
MATT 11:14	'Me ha le rata ho amohela polelo ea ka, ke eena Elia, ea neng a tšoanetse ho tla.
MATT 17:11-12	Jesu a re ho bona, Kannete Elia o tšoanetse ho tla, a busetse tsohle tokeng. Empa ke re ho lona, Elia o se a tilie, 'me ha ba ka ba mo tseba, ba mpa ba mo entse hohle hoo ba ho ratileng. Mora motho le eena o tla utloisoa bohloko joalo ke bona.
LUKA 1:17	O tla mo etella pele ka moea le ka matla a Elia, a tle a busetse lipelō tsa bontate baneng ba bona, le bahanyetsi bohlaleng ba ea lokileng; a tle a lokisetse Morena sechaba se hlekehileng hantle.
LUKA 3:4 (Matt 3:3, Mareka 1:3, Johanne 1:23)	Joalokaha ho ngoliloe bukeng ea litaba tsa moporofeta Esaia, ho thoe, Lentsoe la ea hooang feelleng le re, Hlekang 'mila oa Morena, le lokise litsela tsa hae.

Ho fumana boitsebiso bo keneletseng ba
tšebetso ea Moruti William Marrion Branham le
kamoo u ka fumanang lithero tsa hae, kopana le:

www.molaetsa.org

kapa

Voice Of God Recordings Inc.
South Africa Office

58 Disa Road, Admiral's Park, Gordon's Bay
7140 Western Cape Republic Of South Africa
+27 (21) 8563110
www.branham.org

www.molaetsa.org

SOUTH SOTHO
